

# KIRBEPREDIGT 2008

Servus Ihr minderbemittelte G'stalta,  
Ich soll hier so a Predigt halta ...

(kurze Pause einlegen!)

Mist, i hab mei Skript vertauscht,  
des do ischd durch d'Zensur gerauscht!

Ja, ja Zensur, hend richtig g'hört!  
D'Obrigkeit hat's nämlich g'stört,  
dass s'Niveau so kläglich sinkt,  
wenn dr Pfarrer d'Predigt bringt.

So musstet mir, s'ischd kaum zu fassa,  
d'Predigt vorab gegalesa lassa!  
Dr „Reich-Ranitzki“ hat drüber guckt,  
beim Lesa epileptisch zuckt,  
erst d'Auga groß dann klitzeklei',  
ond dann aus seiner Brust a Schrei (gelispelt!):  
„Volksverdummung, Schund, ein Dreck!  
Nehmt das Skript bloß von mir weg!“

Als er vom Koma dann erwacht,  
hend mir a neue Predigt g'macht.  
Diese hier hat also sein Sega,  
ond Ihr müsset Euch einfach rega,  
falls s'intellektuell zu schwierig wird,  
ond Euch dr Sprachgehalt verwirrt.

**4 lange Tag', 3 no längere Nächt',  
Gott sei Dank geht's ons ned schlecht,  
unzählige Hupa, oi Sauferei!  
Kirbe 08, mir war'n dabei!**

Bevor i muss mei Predigt halta,  
studier ich alle Zeitungsspalta,  
und lese nochmol ganz exakt,  
wo's letzt' Jahr überall hat g'hakt.  
Schreib's z'samma ond reim hin ond her,  
ond breng's Euch jetzt kompakt daher:

Leut, i mach do nemme mit,  
dr Diesel kost' so viel wie Sprit!  
Ond mir wird richtig nach Randale,  
denk i an d'Pendlerpauschale.  
Ond Milch, Butter ond Getreide,  
treibet mich vollends en d'Pleite!

Mei Banker sagt mir ungeniert,  
er häb' sich do verspekuliert,  
mit meinem Immobilien-Fonds,  
doch sei's ned schlimm, s'ging alle so.  
Ond sei Chef, des ischd dr Hohn,  
kriegt no a Sonder-Bonifikation,  
ond zahlt wahrscheinlich hurtig ein,  
bei dr Bank von Liechtenstein.

Dr Staat buttert Milliarden Zaster,  
en des ganze Bank-Desaster,  
mit Steuergelder, so a Mist,  
om z'retta was zu retta ischd.

**4 lange Tag', 3 no längere Nächt',  
Gott sei Dank geht's ons ned schlecht,  
unzählige Hupa, oi Sauferei!  
Kirbe 08, mir war'n dabei!**

Hmmh, was hab i sonst no g'lesa?  
Ischd denn sonst no ebbes g'wesa?

Ach ja, en Bayern Wahldesaster,  
Beckstein ond Huber fall'n durch's Raster.  
Nach dr Hochrechnung gucket se so,  
wie die zwoi Alte von dr Muppets Show.  
Des Wahlergebnis nicht von Pappe,  
für d'CSU a riesen Schlappe.

Doch von Einsicht keine Spur!  
Schuld ischd jo dr Wähler nur,  
wenn er halt ned recht versteht,  
worum's dr CSU so geht.

Seehofer muss jetzt koaliera  
ond mit dr FDP regiera.  
Er lockert erst mol s'Rauchverbot,  
so groß ischd bei dr CSU die Not!  
Könnt des Franz Josef Strauß no seha,  
er würde sich em Grab romdreha.

Au des hätt i fast verpennt :  
Es gibt en schwarza Präsident!  
Mit Aura ond mit Spendenkraft,  
hat es der Obama g'schafft,  
en USA haushoch zu g'winna  
ond den Mc Cain niederzuringa.  
I ben g'spannt, wie er des packt,  
denn des wird a rechter Akt,  
zu bereinigen den Pfusch,  
aus dem Erbe von George Bush:  
Staatsschulda, nemme zom verstecka,  
Händel ond Krieg an alle Ecka,  
schlechtes Image, viele Lüga.  
Lieber Obama, viel Vergnüga!

**4 lange Tag', 3 no längere Nächt',  
Gott sei Dank geht's ons ned schlecht,  
unzählige Hupa, oi Sauferei!  
Kirbe 08, mir war'n dabei!**

Jetzt gang i von dr große Politik  
Aber schnell nach Benninga z'rück:

Gelato, Latte, Saltimbocca,  
gibt's seit em Mai em „Cafe Mocca“.  
Davon muss no viel mehr her  
Dengelberg mit Multi-Flair:  
A Currywurst- ond Kebab-Stand,  
für Sprayer a Graffiti-Wand,  
vielleicht a schöne Freilicht-Bühne  
ond irgendwer spielt „Schuld und Sühne“.  
A schnuckeliges Einkaufscenter,  
mit Badelandschaft für dr Winter,  
En Sexshop fänd' i au ganz locker,  
vielleicht en Platz für Indoor-Soccer,  
a Saunaclub käm' au no gut,  
ond Accessoires für d'Frau mit Hut,

a Zoog'schäft ond a Wettbüro,  
no wäret au die Zocker froh,  
dazu a kleine Kneipenmeile,  
ond weg ischd sie, die Langeweile!

Mol ehrlich ond a off'nes Wort:  
A Mittelpunkt fehlt onserm Ort!  
Bei mir ischd neulich B'such do g'wä,  
die hend des Zentrum überseh',  
am Ortsschild frustriert dann g'wendet  
ond ihr Zentrumssuch' beendet,  
ond no g'sagt: „Do ischd jo kois!“  
Deshalb, Leut : Mir brauchet ois!

**4 lange Tag', 3 no längere Nächt',  
Gott sei Dank geht's ons ned schlecht,  
unzählige Hupa, oi Sauferei!  
Kirbe 08, mir war'n dabei!**

Mei, hend die Pflegebedürftige Glück,  
mit dr „Residenz Neckarblick“!  
Em Juli ischd eröffnet worda,  
mit Sekt ond Kaffee ond au Torta,  
mit viele Gäst, a ganze Blos',  
oba en dr Mörikestroß',  
mit Pflegekräfte, richtig netten,  
ond 48 neuen Betten.

En oins davon lieg i bald nei,  
nach 4 Tag Kirbesauferei.  
Dazu geb i mir selbst dr Segga,  
ond lass mich von de Schwestern pflega.

Oine hat damit nix am Huat,  
denn dera goht's au so no guat.  
Em Jopi Heesters wird's scho bang,  
denn 100 Jahr wurd d'Sofie Lang!

**4 lange Tag', 3 no längere Nächt',  
Gott sei Dank geht's ons ned schlecht,  
unzählige Hupa, oi Sauferei!  
Kirbe 08, mir war'n dabei!**

Des nächst' Kapitel des wird schwer,  
es geht em Ort om dr Verkehr.

Noi, ned om den von Mann ond Frau,  
obwohl, spannend wär des au:  
Intimbericht von Oswald Kolle,  
über dr Warthon ond sei Olle.

Ich moin doch Krafftfahrzeug ond Bahn!  
Mensch, wo fang' i do bloß an?  
Mit Krach ond Dreck, dem ganza Scheiß  
Beim Ausbau von dem zweita Gleis.  
Tag ond Nacht hend die do buddelt,  
ond Alemannenstroß' beschmuddelt.  
UffreiBa, zuschütta, dann planiera,  
d'Anwohner dr Verstand verlierera,  
wenn's nachts om Viere sie's dann schüttelt,  
weil a Maschin' dr Kies neirüttelt!  
Vom G'fühl her – so hab ich erfahra –  
Könntsich do scheint's dr Vibrator spara.

Zwischen Benninga ond dr Schillerstadt,  
es immer scho was geba hat.  
Glaubt mr de G'schichta von de Alte,  
waret's hauptsächlich Vorbehalte.  
War des dr Grund, frag i pikiert,  
dass mr ons Benninger isoliert?  
Denn em August hend alle plärrt,  
weil d'Murrbrück' war jo komplett g'sperrt.  
Ond irgendwer hat no beschlossa,  
dr Steg wird jetzet au no g'schlossa!  
Noch d'Heimergass' Hoh'neck abg'riegelt,  
sch war d'Isolation besiegelt!

Nächt'lang hab ich überlegt,  
welch' Absicht Marbach domit hegt?  
Als logisch ischd dann übrig blieba:  
Die Furcht vor Benninga hat sie trieba!  
Die Angst vor onsrer Vehemenz  
ond der enorma Intelligenz!  
Angst vor onsrer Wirtschaftskraft,  
die ständig Neues, Großes schafft!  
Zittern vor onsrer Kultur,  
als kleines Beispiel nenn ich nur,  
die Dichtkunst hier en onserm Ort,  
die blost so ziemlich alles fort.  
Mit oiner kleina Kirbe-Predigt,  
ischd Schiller's „Glocke“ schnell erledigt!

(kurze Pause setzen!)

Oder hab i doch koi Ahnung,  
ond s'war oifach a Scheiß-Planung?

**4 lange Tag', 3 no längere Nächt',  
Gott sei Dank geht's ons ned schlecht,  
unzählige Hupa, oi Sauferei!  
Kirbe 08, mir war'n dabei!**

Mit was fahr' i jetzet fort  
Ach ja freilich, mit'm Sport!

VfB nur Mittelmaß!  
Hoffenheim macht alle nass!  
Mit'm Geld vom Dietmar Hopp,  
läuft's bei dene richtig top.  
Doch s'Geld allein, des kann's ned sei,  
guck doch mol bei Bayern nei.  
Trotz Geld ond Klinsmann läuft's ned rond,  
au Ribery ischd wieder g'sond,  
ond trotzdem geht's recht zäh voran.  
Es fehlt halt Olli, dr Titan!

Sportlich hat d'Nationalmannschaft,  
scho erste Quali-Hürda g'schafft.  
Nach Tops ond Flops bei dr EM,  
läuft des doch ganz angenehm.  
Dr Trainer spielt mit jungem Blut,  
was a paar „Diven“ störa tut!  
Dr „Chancetod“ Kevin Kurany,  
führt sich auf wie Nachbar's Hanni.  
S'ganz Johr koi Scheurator treffe,  
aber ständig bloß am beffa!  
Steigt mitta em Spiel plötzlich aus,  
ond dr Jogi schmeißt ihn naus!

Au dr Frings, mit Überg'wicht,  
zieht uff dr Bank s'Mimosen-G'sicht.  
Noi, er sei doch ned beleidigt,  
bloß weil er mol ned verteidigt.  
Es sei jo bloß die Art ond Weise,  
die find' er halt oifach scheiße.  
Will bloß a bissle mehr Respekt,  
weil er s'Kicka sonst uffsteckt.

Ond als Dritter gibt em Nu,  
dr K p'tn no a Interview.  
Ballack mosert aus der Fern'  
weil er hat Kumpel Frings so gern.

Koiner wollt jo kritisiera,  
ond dr Coach ned respekтира.  
Jogi sei dr Chef, ganz klar!  
Ja, was soll dann des Blabla?

**4 lange Tag', 3 no l ngere N cht',  
Gott sei Dank geht's ons ned schlecht,  
unz hlige Hupa, oi Sauferei!  
Kirbe 08, mir war'n dabei!**

En Peking war jo dieses Jahr,  
Austragung von Olympia!  
Dr Sport war do ned so em Blick,  
es ging viel mehr om Politik.  
Um Meinungsfreiheit ond Presse,  
ond: „Kriegt dr Tibeter uff d'Fresse?“  
Ischd jetzt eigentlich dr Chines',  
wirklich gelb ond au so b s'?

Noi, dr Chines' war richtig nett,  
zu Sportler ond au zom Tibet.  
Alles dort sauber ond festlich,  
ond dazu no ziemlich westlich.  
Sogar beim Doping kaum Kontrolla,  
mr sah au koine Panzer rolla.  
Guat, die Milchprodukte war'n vergiftet,  
daf r hend se ganz Peking g'l ftet.

Olympia war dr reinste Sega,  
blo  ned beim Medaillen-Rega!

Beim Radsport, Freunde, des ischd sch ,  
halt ich's wie ZDF ond ARD:  
Zu dene ganze „Epo-Ratten“,  
werd' ich nicht mehr Bericht erstatten!

**4 lange Tag', 3 no l ngere N cht',  
Gott sei Dank geht's ons ned schlecht,  
unz hlige Hupa, oi Sauferei!  
Kirbe 08, mir war'n dabei!**

Stellt sich die Frag', wie jedes Jahr,  
wie's denn so em Lokalsport war?

Gab's denn Erfolge? Aber ja!  
D'Ringer nuff en d'Regionalliga!  
Ond au die kleine Fußball-Geister:  
D-Jugend Bezirkshallenmeister!  
Ond v llig ohne Berg ond Schnee:  
50 Jahr Ski beim SCB!  
Au erdem r ckt die WM n her,  
beim Renna mit de Rasenm her.  
Au d'Kirbebuaba hend do g'wonna,  
auf onsre St rka ons besonna:  
a Kanterrieg em M her schieben,  
hat d'Gegner en die Flucht getrieben!

**4 lange Tag', 3 no l ngere N cht',  
Gott sei Dank geht's ons ned schlecht,  
unz hlige Hupa, oi Sauferei!  
Kirbe 08, mir war'n dabei!**

Dr Tennisclub hat Schampus entkorkt,  
glei' 4 Teams hend dr Uffstieg b'sorgt!  
2 mal Herren, Damen ond Juniora,  
an dem Tag h b' wohl koiner g'frora,  
so hei  soll d'Feier g'wesa sei,  
bis Viere oder bis om Drei.

Doch ehrlich, Leut', mr frogt sich blo ,  
was ischd beim Tennis pl tzlich los?  
Ischd des a Doping-Sauferei?  
Oder kann's tats chlich sei,  
dass Boris Becker ischd em Spiel,  
ond sponsort hendarom recht viel?  
Sch n, wenn Boris engagiert,  
dr Verei' nach oba f hrt.  
Ond – dass mir jetzt blo  koiner kichert –  
Dr Nachwuchs ischd dann au gesichert!

**4 lange Tag', 3 no l ngere N cht',  
Gott sei Dank geht's ons ned schlecht,  
unz hlige Hupa, oi Sauferei!  
Kirbe 08, mir war'n dabei!** schlecht,  
Zom Schluss a bissle Sportlerschmerz!  
Em April war's, s'ischd koi Scherz,

wurd' feierlich ond stark beklomma,  
von dr TSV-Halle Abschied g'nomma.

Eigentlich wolltet mir des richta,  
uff Feuerwerk ond Sarg verzichta,  
die Hall' zur letzta Ehre bringa,  
ond se zom Kirbeabschluss sprenga!  
Hend ons ned g'lassa, liebe Leut,  
angeblich wegen Sicherheit.

Oh könnt' die Halle aus ihr'm Leba  
erzähla, des dät G'schichta geba :

125 Pächter,  
ernste Sitzunga, viel Gelächter,  
Versammlung ond au Jahresfeier,  
Diskussion ond Rum-Geeier,  
viel lokalen Spitzensport,  
Voll-Räusch' ond versuchter Mord,  
einige exzessive Feten,  
E-Gitarra ond Trompeten,  
Hochwasser ond Dachstuhlbrand,  
Betrunkenere stürzt vom Bühnenrand,  
Sex en dr Umkleide ond so,  
Schlägerei em Männer-Klo.

S'wird no viel mehr g'wesa sei.  
TSV-Halle ? Aus ond vorbei!

***4 lange Tag', 3 no längere Nächt',  
Gott sei Dank geht's ons ned schlecht,  
unzählige Hupa, oi Sauferei!  
Kirbe 08, mir war'n dabei!***

Ond au mit mir geht's langsam z'End.  
Mi friert's scho an de Füß' ond Händ'.  
Doch mit'ma Schlückle Alkohol,  
fühl i mi gleich dann wieder wohl.  
Guat präpariert für das Finale,  
mit Feuerwerk ond Fest em Saale.

Ich hoff', mir konntet Niveau bieta,  
ond Reich-Ranitzki ischd zufrieda,  
ond kennt jetzt außer Friedrich Schiller,  
au onsern Benninger Kirbe-Knüller!

***4 lange Tag', 3 no längere Nächt',  
Gott sei Dank geht's ons ned schlecht,  
unzählige Hupa, oi Sauferei!  
Kirbe 08, mir war'n dabei!***

AMEN !